

1615.

HOMELIE

7<sup>e</sup>. Carl. 17. 12

# DES DESORDRES DES TROIS ORDRES de cette Monarchie.

*Haranguee en l'assemblee des Estats generaux  
du Royaume à Paris, en l'Eglise des  
Augustins le v. Dimanche  
apres l'Epiphanie.*

Par JEAN PIERRE CAMVS, Euesque de Belley.



A PARIS,  
Chez CLAUDE CHAPPELET, rue saint  
Jacques, à la Licorne.

---

M. D C X V.

*Avec privilege du Roy.*

Case

F

39

326

1615c

THE NEWBERRY  
LIBRARY



HOMELIE  
DES DESORDRES  
DES TROIS ORDRES  
de cette Monarchie.



LE Peintre Parrhasius entreprit vn iour vn ouurage des plus bizarres & extrauagans de tous ceux dont l'antiquité nous face feste. Il auoit veu vne émotion populaire arriuee en Athenes , & le peuple partagé en diuers sentimens par les artifices des Orateurs , qui le faisoient ondoyer au vent de leurs persuasiôs , & flotter incertainement au gré de leurs menees.

Orateurs tant hays de Philippe Roy de Macedoine, par ce qu'ils detraquoient à tous propos ce peuple volage de son obeissance par des reuoltes inopinées , &

souffleuemens frequens qu'il ne peut iamais accoiser qu'en bannissant les Rheteurs de cette ville.

Aussi iamais la mer ne changea de tant de couleurs selon les halenees qui la boursofflent, que ces esprits inconstans varioient de resolutions selon les harangues qui leur estoient faites.

Le caprice monte à la teste de nostre Peintre de représenter cette populace en vn tableau avec des humeurs & contenance du tout antipathiques, & diametralement opposees: il peignit donc ce vulgaire tout ensemble orgueilleux & humble, doux & cruel, farouche & gracieux, sauvage & traictable, paisible & guerrier, furieux, & quiete, remuant & tranquille, insolent & modeste, accariastre & flexible, temperant & immodéré, & quoy non autant de mœurs que de visages, autant de differences que de testes, ouurage rare & excellent, miracle de l'industrie & inuention non iamais veüe.

Onc la Diane de Chio riche labeur de Pyrgoteles, n'y fit œuvre, qui rioit d'une perspective, & ploroit de l'autre.

Messieurs, ie voy en ce portraict de Parrhase vne si viue representation de



l'humeur diuerse de cet Estat, que pour encherir sur Athenes, ie croy que s'il eust eu à naïfuer les François, il s'y fust trouué court, & la variation de nostre naturel eust de bien loing surpassée celle de son industrie : car comment eust il peu façonner la varieté de nos humeurs & temperamens, si ce Peintre de nostre aage ne pouuant nous donner d'habit constant, fut contrainct de nous laisser avec la nudité?

Mais sans emprunter de Parrhase la representation du meslange, qui nous forme, ou plustost difforme, en sçauriez vous desirer vn plus vif exemplaire que le texte Euangelique de Saint Matthieu que nous auons en main, qui traite la Parabole des zizanies que ie surfoy d'estendre à ceux qui l'entendent comme vous faites trop mieux.

Ce n'est qu'il n'y aye de bonnes parties en nostre patrie, & qu'elle ne soit bien paistrée, ce n'est pas que *le bon Pere de famille n'y aye semé de bonne semence & du froment esleu, mais l'homme ennemy y a sursemé tant d'iuroye, soit d'erreur, d'entendement, comme l'heresie, soit de deprauation de volonté, comme le vice,*

le desordre & le débordement que certes, bien que nous soyons assez passionnez pour l'aymer avec ses imperfections, si ne devons nous pas estre si aveuglez que nous ne recognoissions les defauts, avec desir de les amender & corriger, chaqu'un selon sa puissance.

Deux Poëtes Grecs anciens excellens en leur art, estoient d'humeur bien differente pour la condition des femmes, l'un les blasmoit, l'autre les louoit grâdement: celui-là enquis de ses aigres pointes si contraires à ce sexe, veu que son compagnon luy estoit si fauorable; il les represente (fit-il) telles qu'elles deuroient estre, & moy telles qu'elles sont.

Si je traite plus illiberalement vos reuerences, Messieurs, par mes reprehensions, que ceux qui m'ont deuancé par les applaudissemens de leurs langues & louanges dorees, ie vous prie de considerer que bien que diuers en discours nous sommes tous veritables: car comme ils vous ont représenté les perfections que vous deuiez auoir, il ne me reste qu'à vous déchiffrer les imperfections & desordres qui vous affligent.

Le bon prescheur comme le bon mi-

roit doit représenter le monde tel qu'il est , afin ou qu'il se laue & leue les taches qui le défigurent, ou qu'il se maintienne en quelque pureté , s'il en a.

Ceux qui m'ont précédé en cette course ont tellement employé tout le froment d'élite, qu'il ne me reste presque que la zizanie à esplucher , zizanie tellement embarrassée que si le rencontre ne seconde mon desir , ie ne voy pas que ie face réussir le project que ie rumine.

M'en peut-il arriuer comme à ce peintre qui fit sans y penser cette escume à quoy son art ne pouuoit atteindre.

I'eusse volontiers esquiué la semonce, ou plustost le commandement qui m'a esté faict de parler en ce lieu , pour la mesme cause qui fit autresfois à Caton refuser la censure ; & parce, disoit-il, que le monde ne pourroit souffrir ses corrections, ny sa seuerité tolerer les desordres du monde.

Platon s'excusa aux Crotoniates , & se dispensa de leur dresser de bonnes loix : parce, dit-il, qu'ils estoient trop riches pour les obseruer. A Crotone, dis-je, vn Ancien Historien rapporte que tous ceux qui y ar-

riuoiẽt estoient soudain deuorez , non pas avec les dents, par vne Anthropolophagie, mais avec les langues, par les mesdisances & detractions.

Paris , tu es trop grã pour faire profit des bonnes remonstrances , mes-huy on t'admoneste, plus pour la descharge des exhortans, que pour espoir d'amender les exhortez : tu as bien des oreilles pour entendre, ie ne sçay si des cœurs pour concevoir , mais non des mains pour ouurer, ains des langues pour les employer en iugemens diuers & temeraires. Ta grandeur *mole ruens sua* , te porte à la confusion, ceste confusion aux desordres, & ces desordres sont les yuoyes qui corrompẽt ce que tu as de froment plus pur.

De ces desordres fera nostre discours, si tant est qu'ils nous puissent estre comprehensibles : car jamais les mouuemens concentriques & excentriques de l'astre de la nuit , iamais les epicycles de Mercure , iamais les flux & reflux des mares, iamais les inondations & descroissemens du Nil ne furent impliquez de tant d'intriques.

Puissent les douces bouffees de l'Esprit saint enfler les voiles de mes pensees sur  
la



la mer de ce grand Auditoire , pour les faire cingler & surgir à bon port.

Puissent ses Zephirines halenees s'espandre sur nostre texte , pour en discerner le precieux du vil, le grain de la paille, & l'yuroye du bled.

A cela vous pouuez tout par vostre entremise, ô belle Étoile de mer, que i'apostrophe avec le Mantuan Chrestien, nostre deuot & Religieux Virgile en ces beaux vers.

*Tu placidum terris sydus quod liberat omnes  
A pelagi ferno rates, quod luce benignâ,  
Saturni, Martisq; graues eliminat iras:  
Tu nobis Elice, nobis Cynosura per altum,  
Te duce, vela damus portus habitura secundos.*

*Aue Maria.*

B

**L**s disent que l'Abeille a ceste propriété, Messieurs, de quintessencier le suc de son doux & roux miel, en attirant le seul esprit des fleurs sans interresser en quelconque façon la couleur des fueilles ny ternir leur frescheur.

Je tascheray d'en faire de mesme sur mon texte, effleurant simplement son escorce; & faisant vne espreinte spirituelle d'intelligence mystique sur laquelle i'establi ray la baze de mon discours.

On dit qu'Archimede ne desiroit qu'un poinct hors de la terre pour l'enleuer *des fondemens de la stabilité*, balancee dans le vuide de l'air & soustenuë du seul centre du monde: & ie ne prendray qu'une simple consideration & reflexion sur ceste parabole Euangelique, pour y attacher le courant de ceste Homelie.

Remirant donc en ce meslange inextricable de zizanie & de bon grain, l'extrême desfreiglement de ce Royaume, auquel pour remedier, sa Majesté nous a conuoquez en ces Estats generaux, i'ay

pensé que ie ne vous pourrois plus vtilement entretenir, ny plus conformement au sens parabolique, que de vous représenter les *Desordres des trois Ordres de ceste Monarchie*, & cela avec le plus de methode qu'il nous sera possible.

Mais, ie vous prie, quel ordre peut-on rencontrer parmy le desordre? n'est-ce pas proprement,

*Delphinum syluis appingere, fluctibus aprum?*

N'est-ce pas vouloir motiler de l'argent vif?

N'est-ce pas vouloir estreindre vn Prothée, peindre vn Cameleon, & vn Poulpe?

N'est-ce pas chercher de l'arrest dans l'instabilité, la fermeté dans l'inconstance, & pourtraire ceste idole ancienne qui varioit de plus de formes que le Peintre n'auoit de couleurs?

Iamais la mere de la Lune ne luy peust faire de robe, sinon de resueil, dir la fable, parce que les mailles de ce tissu l'allongēt & accourcissent selon la variation de cet Astre: de là les taches de son orbe, adjoustent les conteurs.

Et y-a-il rien par tout là de plus extravagant & desordonné que le desordre? comment donc le presenter ordonnément? qui nous prestera vn filé pour ce Dedale? ou qui nous tranchera ce nœud indissoluble? ou qui nous demellera ceste fusée?

Ou comme le ver à soye qui s'emprisonne en son peloton, craignons-nous point de nous empestrer en l'embarras de nostre tiffure?

Ezechiel vid des roües enclauées les vnes dans les autres avec des emboëttemens qu'il ne pouuoit comprendre sans le visage de cest homme qu'il vid au milieu qui les luy enseigna; que d'intriques en nos desordres, & toutesfois *hominem non habeo*, qui me les esclaircisse nettement.

Quand vn horloge est detraqué, les maistres recognoissent incontinent d'où vient le defaut; les trois Ordres qui nous composent estans bien dressez & conduits par la symmetrie d'une iuste & proportionnée correspondance, font aller de mesure les cadences de cest Estat: mais d'où vient donc ce desordre & detraquement qui nous rend confus?



vient il du plomb? ie ne le voy pas, du balancier ou du timbre, metal haut & clair sonnant? ie ne le croy pas, il y auroit plus d'apparence de penser que cela vint des rouës & des chordes.

Somme ne vous semble il pas que c'est chercher le vuide dans le plein, & le carré dans le cercle, que de desirer l'ordre dans le desordre?

L'espere neantmoins tousiours le rencontrer, car puisque *les mauvaises mœurs font esclorre les bonnes loix*, pourquoy ne croirons nous pas que le grand desordre nous presse à rechercher l'ordre?

On a bien trouué l'inuention de faire deuenir doux les amandiers amers.

D'extraire de l'eau douce du milieu de la mer avec des vases de terre, ou de cire.

De tirer l'antidote du poison du poison mesme, comme il appert en la Theriaque.

On lit bien que proche les Isles Chelidoines, il y a des veines d'eau douces dans la mer.

On conte bien que les flammes de la Deesse de Cypre, sont sorties des flots Et que les Nereides Nymphes del'Océa, faisoient leurs retraittes dās les fontaines douces qu'elles rencontroient en ce vaste sein.

Et pourquoy à pareil air n'espererions nous pas de trouuer de l'ordre à ces desordres, & quelque ordre pour vous discourir de ces desordres?

Or de les déduire tous il est impossible, car la Lybie n'a point plus de sablons, ny le Ciel d'estoiles qu'il en fourmille parmy nous : il me suffira de remarquer trois desordres principaux & visibles en chaque Ordre qui feront en tout neuf points sur lesquels ie me vay estendre si vous me continuez, Messieurs, vostre fauorable attention.

Le premier desordre que ie remarque en l'Eglise, le dirai-je pourueu qu'on ne se cabre à l'abord, c'est l'abus inueteré des Commandes.

Quelle monstruosité de voir des seculiers commander à des reguliers, *ceux cy porter le poids du iour & du chaud*, ceux-là sans rien faire auoir tout leur honneur & leur substance? n'est-ce pas renuerfer toute police, & faire commander par vn homme de pied vn ost de caualerie?

Le sel, Messieurs, tiré de la mer, desseiché & cōme petrifié, se conserue longuement, mais reiecté dans l'eau il se dissout & putresce. Les biés de l'Eglise, pour la plus part,

viennent de la pieté des anciē deuots, qui viuoient dans le monde; ces biens se sont ce semble rendus perpetuels parce que les loix les ont declarez inalienables, mais retombans par ces Commandes és pattes seculieres n'ayez pas peur qu'il dure longuement, aussi ne voyez vous és Abbayes que ruines, desolations, alienations, calamitez, dilapidations & miseres.

On lit que quelques voleurs en Toscanne exerçoient cette cruauté vers ceux qui tomboient vifs en leurs mains, ayans fait quelque resistāce, que de les attacher avec des corps morts, & les laisser ainsi mourir de puanteur & de faim. Que sont les Religieux sinon *viuentes mortui*? aussi sont-ils censez par les loix morts d'une mort civile: De là les ceremonies funebres qui se pratiquent à la professiō des Benedictins. Et que sont les Abbez seculiers sinon des viuans, & souuent que trop viuans en leurs immortifications? & ioindre ces personnes si dispathiques & dissonantes, n'est-ce pas pratiquer spirituellement le supplice de ce Mezēce qui auoit de coutume

*Corpora corporibus coniungere mortuaviuis?*  
En ce desordre ne pouuons nous pas dire

avec autant de verité que ce Poëte disoit  
avec vanité,

*Iungentur iam gryphes equis, æuoque sequenti  
Cum canibus timidi venient ad pocula dama.*

Tandis que les vns comme pauures che-  
uaux destinez au labourage, *vt iumentum  
facti apud Deum*, font l'office iournalier, les  
autres comme gryphans aggraphans, gar-  
diens ordinaires des thresors ou minieres,  
emblent tout, rauissent tout, donnans sou-  
uent à des chiens le pain des enfans de la  
maison; mängez comme Actæons par leurs  
meurtres de chasse, ou comme des Ly-  
caons despençans en cheuaux & prodi-  
guans *carnes sanctorum bestiis terra.*

Mon Dieu l'odieuse chose qu'un clerc,  
chasseur, & escuyer, les Canôs qui en ont faie  
la deffence deuoient aussi paruenir à l'e-  
xecution : car ces exercices, outre qu'ils  
ont de grandes indecences portent en-  
cores à la pente de beaucoup de depra-  
uations, font oublier le soing des Eglises,  
*Venator tenera coniugis immemor*, & quel-  
quefois le salut, la chasse des bestes fauues  
estant souuent suiuite de celle des puantes  
& infames.

Les Arboristes tiennent qu'on ne faict  
rien qui vaille d'enter vn greffe à noyau,  
sur



sur vn tronc à pepin, cet adultere reüssit  
toufiours mal: & qu'est-ce de planter vne  
teste seculiere sur vn corps regulier, sinon  
vne infition plus extraordinaire?

Ce n'est pas que d'une temerité trop  
presumptueuse i'en sindicque la dispen-  
se, ny que i'en dispute la validité; ce  
qui plaist aux Superieurs ne doit estre  
sans grande raison improuué des moïn-  
dres, mais si peut-on dire avec licence &  
verité, que quād cet vsage ne seroit point  
il n'en seroit que mieux en l'Eglise.

L'origine de cette institution ou plu-  
stost destitution, est legitime & peut estre  
pieuse, mais comme le passage est facile  
de l'vsage à l'abus, aussi a-elle beaucoup  
degeneré de son principe.

On sçait assez qu'elles ont commencé  
par le debat des elections, par vne espece  
de depost temporee, que ce n'estoit  
qu'une simple administration du reue-  
nu, le siege Abbatial vacant, maniemment  
subiect à vne exacte reddition de compte.

Depuis elles se sont perperuees es per-  
sonnes des grands Prelats pour le sou-  
stien de la splendeur de leurs dignitez.  
qui ne se pouuoit maintenir par l'vnité  
d'un benefice, autrement necessiteux en

leur spirituelle Monogamie.

Iusques là mil abus : car , estant tout constant en saine Theologie que c'est descendre , que de retrograder de l'Episcopat , estat de perfection acquise , au Monachisme , estat de perfection à acquerir ; vn Religieux pour austere qu'il soit pouuant deuenir Euesque , non l'Euesque decliner à estre Religieux sans dispenses du S. Siege , fondees sur grande cognoissance de cause pour n'inuer tir les loix de la Hierarchie Ecclesiastique. Je ne voy pas qu'un Euesque ne puisse ainsi estre ou deuenir Abbé sans se faire Religieux , puis que par l'Episcopat la Regularité se laisse.

Mais d'estendre cela à vn monde de gens purement seculiers , qui n'ont aucun caractere Episcopal , non pas souuent de Prestrie ou de soubdiaconie , quelquefois non tonsurez , ordinairement enfans , plus que communement laics & prophanes tout à fait , c'est où il faut qu'un zele saint de la maison de Dieu me transporte à crier hautement & hardiment que c'est vn abus insupportable , vn desordre odieux , vn desreiglement effroyable.

Abbé sonne autant que Pere, & n'est-il pas gracieux d'appeller Pere vn enfant du berceau? n'est-ce pas pour reuenir à ce mot, *Pro patribus tuis nati sunt tibi filij?* & à cet autre, *dabo vobis principes pueros?*

Et si vn ieune Abbé est donné ( comme il arriue quelquesfois ) à instruire à quelque docte Religieux de son Monastere, & qu'il en soit corrigé, n'arriuera il pas que lors le fils disciplinera son pere? iugez à quel monde renuersé nous porte ce desordre.

Pauvre Eglise, faut-il que tes dispensations se tournent en dissipations. l'ay grand peur que celuy qui le premier a franchy cette barriere, & qui a *dissipé cette haye, soit mordu du serpent, & ne soit pas à s'en repentir.*

Faut-il que comme les Escholiers de l'Athee Theodore, nous prenions de la gauche ce que l'Eglise en l'introduction de cet vsage donnoit à droict?

Abus, araigne pestilente, conuertiras tu tousiours en venin ce que la belle rose peut espanouir de plus florissant?

Est-il bien possible que le ruisseau soit si bourbeux d'une source si limpide & si claire?

Malheureux pretextes, vous estes tous-  
jours ces traistres qui liurez les villes au  
fac & à la proye de leurs ennemis.

Vous paroissez languissans & malades  
comme les soldats que Cesar glissa spe-  
cieusemēt en Capouë pour la surprendre.

Vous baïsez comme les Philenes pour  
tuer, cōme les singes pour estouffer, vous  
pleurez comme les Cocodtilles pour de-  
vorer, vous soupirez cōme l'Hyene pour  
decevoir.

De mousches vous deuenez Aigles, de  
fourmis Elephans, quels desordres ne se  
sont introduits affublez de vostre mâteau?

*Nusquam tota fides eiectum littore egentem  
Excepi, & regni demens in parte locavi.*  
peut dire la regularité à la secularité.

*Heu patior telis vulnera facta meis!*  
peut-elle dire encores.

O pretextes, que vous estes cruellemēt  
doux, que gracieux à la bouche, qu'amer  
au ventre, comme le liure du Prophete!

Vous ressemblez à ces familles d'Afri-  
que, qui enforceloient en riant.

Vous auez la voix de Iacob, mais les  
mains d'Esaü.

Et à propos de ces deux freres, qui ne  
voit en leur dispathie mesme yterine la



perpetuelle contrarieté de la regularité & secularité, celle-cy ayât par supplantatiō, comme vn autre Iacob, attrapé le droit de primogeniture de l'autre, & cela pour vne soupe de lentilles sous couleur d'vne simple & temporanee administration des reuenus?

*Ante leues ergo tollentur in athera cerni.*  
que d'accorder ces contrarietez.

L'os disloqué fait tous-jours douleur iusqu'à ce qu'il soit remis en son emboët-teur.

Oseray-je dire avec autant de courage que de verité, que les Commandes abusives & escartees de ces premiers termes & principes,

*Quos ultra citraque nequit consistere retum.*

ouurent la porte à vn monde de desordres, notamment aux Confidences, aux pensios, & à la pluralité de benefices, trois fleaux du bien Ecclesiastic?

Diuisez le Gange vous l'assechez : destournez les canaux de Bethulie, vous les reduisez aux extremittez : ramassez plusieurs torrens en vn, vous faites vne mer d'inondation; & tout cela ruineux & incommode; & voilà les peintures de la cō-

fidence, des pensions, & de la multiplie-  
té des benefices accumulez en vne mes-  
me personne.

Outre cela, c'est vne pure corruption  
de la Hierarchie Ecclesiastique, & vne en-  
tiere deprauiation des vrayes & diuines  
Vocations.

Sichem pressé de l'amour de Dina, se  
resoult à la Circoncision au plus fort de  
ses douleurs. Israel vient à main armee  
qui le saccage. Cōbien de gens d'ailleurs  
incapables de souffrir la Circoncision de  
la Continence, & aussi scachans que les  
prophanes & souillees de l'accointance des  
femmes ne peuuent ny doiuent manger  
les pains de proposition sacrez, & consa-  
crez au tabernacle? Combien, dis-je, de  
Cadets de bonne maison, plus propres à  
porter vne espee qu'une sotane, se resol-  
uent-ils enuis à la Continence, pour a-  
uoir sinon Dina, au moins à disner par  
le moyen de quelque gras benefice de  
quelque riche Abbaye? Ainsi viennent-ils  
*en l'Eglise sans estre appelez*, & au lieu de se  
comporter en terre sous les influences  
du Ciel, ils se portent au seruice du Ciel,  
pour des commoditez de la terre.

Combien s'en faut-il *qu'ils ne soient ap-*

pelez de Dieu comme Aaron, Samuel ou Moysé?

Mais aussi quelque temps apres, lors que gorgez de commoditez, *luxuriat bene pasta caro*; Combien est-il facile à ce mauuais esprit, qui, *comme vn Lyon rugissant rode tousiours aux aguets*, de les faire succomber aux lubricitez & ordures qui ne remplissent que trop le monde de puanteur & de scandale, c'est lors que,

*Inuadunt hominem somno vinoque sepul-  
tum.*

L'aduoüe que ma reprehension sera iugee de tant plus inutile que c'est vne temerité d'entreprendre de guerir vn vlcere inueteré. On console quelquesfois des vieillards qui ont les jambes vlcerees, & qui ont vrayement *tibias fistulatas*, en leur disant que ces playes sont leur santé: froide consolation d'vne santé malade & d'vne commode incommodité, vuidange de leur cacochimie; pour estre ce mal inueteré, il n'en est pas moins mal, ains pire mal, ains moins guerissable mal.

Foible lutte d'vn homme contre vn torrent, d'vn Darés contre tant d'Entelles: me suffit d'auoir representé ce desordre.

Pour passer au second que ie remarque en nostre ordre, qui est celuy des habits.

Habits propres & peculiars qui nous doiuent estre tellement inherens & collez, que ce nous soit pareil crime d'en estre rencontrez deserteurs, qu'au soldat d'auoir perdu ou abandonné ses armes.

La mere à ce Lacedemonien luy passant le pauois dans le bras : *Reuiens*, luy dit-elle, *ou dedans ou avec*; dedans, si mort; avec, si vivant tu retournes de la meslee.

Et cest autre Spartain continuellement encuirassé, protestoit que ses armes ne l'empeschoient non plus que sa peau, voire-mesme qu'elles luy sembloient des aisles.

Au plumage on cognoist l'oyseau & à l'habit se recognoist l'Ecclesiastique : & comme il n'y a animal qui ne se plaise en la couuerture que la nature luy a donnee, aussi n'y a il telle chose que de s'agreer au vestement de sa profession.

En cela, Messieurs du Clergé, permettez moy de vous dire librement & ouuertement, que nous faillons autant ou plus qu'aucun des autres Ordres. Vergôgne que le nostre qui deust estre en tout  
leur



leur exemplaire, soit en ce point si reprehensible.

*Le fils de l'homme*, nostre modele, est veu en l'Apocalypse *vestitus podere*, & quād nous chargeons la sotane clericale il semble que nous soyons *vestiti pondere*, & que comme des Athlas nous gemissions sous ce faix, comme si le *joug de N. S.* n'estoit pas suave & doux; & non onereuse, ains honorable la liuree qui nous faict cognoistre Leuites.

Ce que les fēuilles aux fruicts, l'escorce aux arbres, l'est l'habit à la personne; bien qu'il ne monstre pas-tout-jours quel est l'homme vrayement, il le demonstre vray-semblablement.

L'habit desdaigné est vn grand preiugé d'une vocation peu affectionnee; les Philosophes alloient autresfois vestus de sorte qu'on recognoissoit qu'ils viuoient philosophiquement.

Et cest ancien Athlete qui cognoissoit les bons luitteurs à leur simple alleure, nous permet de iuger par la robe exterieure l'interieure constitution.

C'est peu que l'habit, je l'aduoüe, & cestoit peu que sept poils ausquels consistoit neantmoins la force du robuste San-

son. O combien a d'ascendant sur l'impression du vulgaire vn vestement modeste marque d'exemplarité!

Or, Messieurs, vous sçavez que l'habit clerical consiste en deux choses, l'vne inherente au corps, qui est la Tonsure, l'autre qui se peut poser pour le repos, comme la robe: & ie voy deux grands desordres en la premiere, & quatre notables en la seconde, que sans vous flatter ny espargner, ie vous vay monstrier au doigt.

Premierement quel déplorable manquement voyōs-nous estre en la plus part de ceux qui sont honorez du caractere des saincts Ordres, au fait de la couronne clericale? Helas! ne pouuons nous pas dire que ce sont nos pechez plustost que la paresse qui la font tomber de nos testes? *Cecidit corona capitis nostri, vae nobis quia peccauimus.*

Quoy? auons nous honte de ce qui presente la Couronne d'espines de nostre Redempteur? auons-nous pudeur de paroistre à nostre rasure ses sacrez esclauēs d'vn esclauage preferable à vne Royauté?

Redoutons-nous point qu'il aye vergongne de nous deuant son Pere, puisque nous rougissons d'estre siens deuant les hommes?

Où est la pieté, où la deuotion, où la conscience, où l'honneur, où la marque de nostre Sacerdoce, où le saint amour que nous deuons à nostre Espoux? Si nous reiettons sa couronne d'épines nous n'aurons iamais celle de gloire en l'heureuse eternité, *où nul sera couronné qui n'aura combattu icy.*

Helas! les Roys de la terre sont si jaloux de leurs Couronnes, que la moindre chose qui les touche, les met aussi tost en ombrage. Et nous laissons laschement la nostre qui rend nostre *Sacerdoce Royal, nostre gent sainte*, & qui est plus venerable au Ciel & aux Anges, que tous les diadèmes terriens.

Quoy? nous sommes si rigoureux observateurs de la tonsure en nos petis Clercs, Choristes ou Nouices, & si relaschez pour nostre regard: hé! n'aura-on pas iuste subject de nous reprocher, que si nous sommes Prestres, nous ne sommes pas grands Clercs, du moins tonsurez?

Combien sommes-nous descheuz de ceste seuerité premiere des anciens Canons qui vouloient la rasure frequente de la barbe & de la teste, ne laissant qu'un bien petit cercle autour des temples pour

marquer le rond de la couronne clericale.

Que si ou l'vsage, ou la licence, ou quelque decence ont toleré qu'on peust nourrir le poil sous la levre inferieure, tous-jours y a-il eu commandement, ou par constitutions Synodales, ou autrement, de le tenir court en la levre superieure, tât pour n'empescher les libres fonctions de l'Autel, que pour l'indecence qui prouient droit de sa longueur.

Nonobstant ces iussions, quel desordre voyons-nous practiquer en cela? diriez-vous pas en la pluspart qu'ils veulent imiter les Turcs qui se rasent le menton, & laissent croistre leur poil en la levre haute pour se rendre plus redoutables?

Cela est encores tolerable en la soldatesque, qui se sert de ceste mode pour se rendre plus formidable au regard.

Quoy, Leuites, les voulez-vous donc imiter pour rendre ainsi *l'Eglise terrible comme un camp de gens-d'armes*, vous qui ne devez au rebours respirer que douceur, que modestie, qu'affabilité?

Je vous declare que ces poils blessent de jalousie le cœur de vostre Espoux, & que ceste façon desplaist grandement à ses



yeux. Il semble que vous vouliez regarder par des treillis, & jalousies, de permettre que ces pampres luxurians vous creuent ainsi & offusquent la veüe.

Vous diriez que ce sont les hydeuses deffences de quelques sangliers : quoy? voulez vous ressembler à ces animaux farouches, chez le Psalmiste, où la commune lecture porte, *singularis ferus*, vne autre dit, *siluester gallus* ; voulez vous rendre l'humanité du François ainsi sauvuage?

Non, non, rasons ces estendars d'ineptie, & nous souuenons que comme les femmes, pour sages qu'elles soient, ont tous-jours quelque sorte de vanité autour de leur sein: les hommes aussi ont tous-jours en leur levre superieure quelque amusoir d'impertinence.

Ie viens aux habits où ie voy quatre desordres, car les vns ou portent celuy qu'ils ne deuroient pas porter, ou ne portent pas celuy qui leur est conuenable, ou portent leur propre habit autremét qu'ils ne deuroient, ou ne portent pas tout ce qu'ils deuroient.

Pour les premiers, voulez vous vn plus grand desordre que de voir des laics fr.

surper l'habit clerical? O laics, que vous estes laids avec telle indecence, de quel front osez-vous paroistre avec vne fortune Ecclesiastique?

Gedeon perit luy & sa race pour s'estre fait vn Ephod; ne redoutez-vous point pareille peine de semblable coulpe?

De plus, aduisez, Messieurs les Prelats, combien de gens s'approprient vos rochers & camails, sans raison, sans titre, sans ordre, auant terme, & sans licence, n'aurons nous jamais de *Mathathias qui oste l'opprobre d'Israel*?

Vous ne jalousez point vostre habit *d'une sainte emulation de Dieu*, c'est signe que vous n'avez pas grande affection à vos charges, ou que vous vous y portez avec beaucoup de lascheté.

Quelle confusion est-cecy de ne scauoir qui on est, ny où l'on est? pourquoy la difference des habits sinon pour distinguer les hommes & y remarquer leurs qualitez & leurs rangs?

Ceux qui sont peu veulent paroistre plus qu'ils ne sont, ceux qui sont beaucoup, veulent sembler moindres: l'un orgueilleusement esleue sa bassesse, l'autre laschement rauale sa dignité, & tous d'y-

ne iniustice pareille & dommageable au public.

Que chacun se tienne en son lieu, & que le pied ne face pas la teste: toy qu'une fortune mediocre ne tire pas hors du pair tiens toy en la presse.

*Respice quod non es, tollat sua munera cerdo,  
Tecum habita & noris quàm sit tibi curta  
supellex.*

Toy qu'une qualité eminente oblige à la prospectiue, piece de monstre & d'estatement, pourquoy te caches-tu?

*An te Thersita similem produxit Achilles?*

Femme de Ieroboam pourquoy te desguises-tu? est-ce donc pour viure avec des coudees plus franches? ô la malheureuse liberté, qui ne vise qu'au mal! Iettons, iettons là les armes de tenebres, & chargeons celles du iour.

En ce meslange si extreme qui nous bigare, on prend tel pour lay qui est clerc, & tel pour clerc qui est lay, le maistre se prend pour le suiuant: *nulle distinction entre le Iuif & le Grec.* Hephestion se prend pour Alexandre, & maints Philopœmès payent les apports de leur mauuaise mine.

O laics de robe, que l'on appelle longue,

qu'il vous sied mal de prendre la forme de nos habits, ô Clercs, qu'il vous est mesaduenant de vous reuestir de la matiere, & des estofes des laics, la laine comme à des Agneaux, vous est commandee & re-commandee, & vous vous parez souuent de la foye, excrement & baue des vers, comme les prophanes enfans du siecle & de la terre.

Auguste reprenoit le luxe des vestemens de sa fille Iulia, luy representant la modestie de sa mere Liuia, cette vaine & insolente luy repart brusquemēt que Cesar en ses habits degenereroit de sa qualite, & sa mere de celle d'Imperatrice : mais que pour elle, elle se souuenoit d'estre fille d'Empereur. Combien de ieunes Clercs remaschent pareille cogitation, couurans de la Noblesse de leur naissance l'immodestie de leurs habits indecens à leur vacation.

Mais ne dirons nous rien de ces collets mondains transplantez odieusement en nostre ordre, pour rendre voirement le *col de l'Eglise semblable à la tour ronde de Dauid sise sur le Liban?*

Mais à quoy pēsez vous, vous qui portez cet affiquet damoyseau, en bonne verité



verité, sçavez vous bien ce que vous estes, ce que vous faites, ne voyez vous pas que cette sottise de vain parement est du tout incompatible avec les ornemens de l'autel? ne considerez vous point comme le monde s'en rit, & qui pis est s'en scandalise?

*Este procul nobis iuvenes ut fœmina compti.*

*Fine coli modico forma virilis amat.*

O Dieu comme nostre argent est changé en escume, nostre or terny, nos charbons deuenus cendres. O nos Peres, qui nous auez de-uancé, nous mescognoissez vous point du haut des Cieux?

Mais qui à voir la culture de la teste & du col, & puis le reste de l'habit ne prendroit ces Clercs, tirez pour des Hermaphrodites, diriez vous pas avec Horace que,

*Desinit in piscem mulier formosa superne?*

Qui vid iamais chose plus monstrueuse que des Minotaures demy Courtisans, & demy Clercs.

Et ne redoutez vous point cette visite que Dieu menace par vn Prophète contre ceux qui se vestent d'un habit peregrin?

Que vous reste-il plus sinon des perruques, des goderons, & des plumets pour

faire l'entier desordre.

Quoy, pensez vous que cōme la figure spherique est la plus parfaite, il y aye quelque perfection en ces rotōditez, mais plustost qu'il y a d'imperfection & de niaiserie, pardonnez à cette liberté Messieurs, vous sçavez que

— *Gallis dedit ore rotundo*

*Musa loqui.* —

Pour moy ie voudrois que vous fussiez

— *Teretes toti atque rotundi.*

Mais à vray dire par le cœur, & la cōscience, plustost que par le col & le collet.

Vostre continēte condition vous a fait renōncer au mariage, laissez dōc aux femmes, & aux effeminez ces paremens qui ne sont proprement que *Incentiva luxurie*. Quoy: faire les iolis, & les marjolets en l'exterieur, & penser que le monde vous croye fort temperez en l'interieur, c'est chose que le vulgaire ne goûte gueres, c'est nourrir des glaçons dans les flammes.

Le Pan faisant sa rotonde & pavonnade, attire ses femelles à soy: si vous ne redoutez vos propres fautes, ne vous rendez point encores coupables de celles que vostre vanité pourroit causer en autrui.

Le second desordre est de ceux qui ne portēt pas l'habit comme il est cōuenable. Je parle à vous, Messieurs les Prelats, que dis je à vous, mais à moy-mesme qui presche, afin que ie ne Mercurialise avec les autres : & que faisons nous avec ces habits noirs , où sont nos sotanes, nos camails violets , *quomodo immutatus est color optimus* , comment auons nous honte de l'honneur, cruelle maladie si nous auons à contre-cœur vne vjande si appetissante.

Seroit-ce point vne tacite confession, & de mauuais augure, que nous sommes indignes de ces dignitez, ou qui seroit biē pis vn adueu irreligieux, que nous traitons avec mespris nos marques plus honorables, muez donc d'espece si vous ne vous aggreés en ce beau plumage.

Mais me direz vous , ô Censeur , que n'estes vous donc monté en ce pulpite vestu comme il faut, pour sindiquer, & d'effeſt, & de parade, ce que vous auiez à controoller si librement puis que

*Sic agitur censura, & sic exemplarantur*  
*Cum index alios quod monet ipse facit,*  
& que

— *Non inflectere sensus*

*Humanos sic dicta valent ut vita dicentis.*

A cela, Messieurs, ie vous reparts que i'ay pensé faire par raison ce que ie faisoys par exemple de si grands personnages, bien que comme m'apprend vn Ancien, *Excusationem non faciat multitudo peccantium.*

De sorte que comme Adam, apres auoir peché, reietta la faute sur la femme: aussi diray-ie, que i'ay esté deceu par la couleur de l'habit de ceux que Dieu m'a donnez pour Peres en eminence de merite, & pour freres en identité de caractère.

Que n'imitois-ie donc au moins, me repliquera-on, ce pieux Prelat, *quem vnxit Deus oleo letitie præ consortibus suis*, qui vient de celebrer avec l'habit que vous requerez la sacree synaxe? I'ay veu, Messieurs, qu'outre qu'une hyrondelle ne fait pas le printemps, que ma reprehension auroit dauantage d'energie, si mesme i'estois enclos en la Cathégorie des reprimendez.

Et ne doutez nullement que ce pourpre, pour sacré & venerable qu'il soit des Illusterrimes Cardinaux, fut exempt de mes attaintes si i'y voyois vn pareil desor-



dre: car la parolle de Dieu n'a aucune acceptation des personnes, les Prophetes ont-ils pas autrefois frappé sans recognoistre?

Mais, Messieurs, disons cecy malgré leur humilité, que *bien qu'ils soient grands en rang, ils le sont encores plus en exemple*: comme parle vn Ancien, Illustres Chefs, & Presidents de nostre corps, & tres dignes de leur dignité.

Quoy? les voir tous les iours à l'autel, les premiers à venir, & les derniers à sortir de l'assemblée, fermes & constans és résolutions, prudens és determinations, exacts en l'observance des habits, porter toutes les charges de la conduite, ne recuser aucun labeur, prompts aux reparties & replicques, inflexibles au mal, ne desdaignans les moindres, patiës aux difficultez, *lumières du monde*, flambantes de zele, portez ardemment au bien commun & public de la religion, & del'Estat? Princes de l'Eglise, de science admirable, de conscience tres-entiere, de mœurs irreprehensibles, miroirs de perfection, vray boys duquel pour la sainteté de leur vie se font les *saintetez*: tout cela sont-ce choses dignes d'oubly, & qu'il faille, sous le pretexte

de la pudeur d'une presence trahir par un silence lasche. Soyons, Messieurs, semblables à nos Chefs, & nos combats seront autant de victoires.

Sinon nous ferons dire de nostre corps, comme du Cinnamome, que sa plus souëve odeur consiste en sa sommité.

Le troisieme desordre est de ceux qui portent l'habit, mais autrement qu'ils ne deuroient: car que sert une robe de laine si le dessous n'est que velours & satin?

Voulons nous ressembler aux Herissôs pleins de picquans au dehors, de mollesse au dedans, ou à la Tortuë dure en la coque: mais doüillette en sa chair?

Nous serons beaux & modestes en l'exterieur comme l'Espouse, *absque eo quod intrinsecus latet*; que sert de cacher aux yeux du monde ce qui est manifeste au maistre que nous servons?

Que sert d'avoir *des tēplettes d'or vermeil- lonnees d'argent*, & de cacher une vanité de soye bigarree qui se fait voir quelquefois *sicut fragmen mali punici* par l'entr'ouverture d'une sotane?

Seroit-ce point *les cheurons de Cedre*, bois precieux cachez par un lambris de *Cypres*, bols moins rare?

Seront-ce point les *tabernacles de Cedar*, les *peaux ou tentes de Salomon*, noires, laides & ridees au dehors, mais pleines de dorures & magnifiques meubles au dedans?

Vn ancien Philosophe chez Eunapius, portant vn bel habit sous vn meschant manteau, le voy, luy fit vn rieur, ta vanité à trauers vn trou qui est en ta cappe.

Ezechiel perça la muraille du temple, & il y vid les idoles secretes d'Israël. Vous qui sous vn habit long & modeste, cachez la broderie & le parfum, redoutez-vous point qu'un vent rebroussant ceste escorce estale le vent de vostre ineptie, & descouure vos superfluités? s'il y a plus de monstre ie tiens qu'il y a encores plus de raison de porter la laine sous la soye que la soye sous la laine. Dieu vueille que ceux à qui ces remonstrances s'adressent, en fassent bien leur profit.

Le quatriesme desordre que i'ay dit, est de ceux qui ne portent pas l'entier habit qu'ils doiuent auoir. Quelle honte, Messieurs, que nous qui par vn libertinage Cisalpin negligens ce semble, toutes les rubriques des Ceremoniaux, dont les

estrangeurs qui ne sont meſlangez d'aucune heresie comme est nostre nation, sont si estroicts, & exacts obſervateurs, preſerans nos fantaiſies ou certaines couſtumes, à des regles ſi bié dreſſées & approuuees par les Pontifes Souuerains, ſommes encôres ſi laſches en l'obſeruance de ces vſages.

Le port de la Croix d'or qui pend au col de pluſieurs Eueſques de bois, *quorum primus ſum ego*, marque ſeule de Prelature en France, combien eſt-il, ie n'oſe dire, negligé, mais delaiſſé par pluſieurs, de peur d'eſtre ce ſemble, reconnu parmi les gens de deuotion?

Et ce meſme port vſurpé par tant de perſonnes qui ne ſont marquées du caractere Episcopal, combien tout cela engendre-il de conſuſion & de deſordre?

O bon Ieſus, qu'on abandonne ainſi la marque de voſtre Croix, ſeule anchre de noſtre ſalut, les reliques de vos Saints y encloſes, effacer la lettre Tau, deſdaigner le ſigne d'eſlection? O, *Pastores; ô idola; derelinquentia greges & crucem.*

C'eſt bien au lieu de charger la Croix, & ſuivre N. S. qu'on ſ'en deſcharge, & on le fuit. Si les Pilottes quittent le gouuernail,  
tout



tout est-il pas perdu, qu'attendre sinon le naufrage. *Heu fuge crudeles terras. Laissons tout là, Migremus hinc.*

Laisser la Croix, abandonner l'Arche, ô mercenaires, faut il ainsi jeter la houlette quand le loup vient? pouvons-nous pas bien dire que,

*Excessere omnes adytis arisque relictis,*

*Dij quibus Imperium hoc steterat.*

Le surseoy de presser ceste reprimende pour ne reduire vos fronts à ce point, de n'auoir assez de place pour rougir de vergogne.

Le couleau troisieme desordre de nostre ordre, qui ne sera autre que le desordre mesme. Comment sera il dit que dans le Sacerdoce, qui par excellence est appelé Sacrement d'Ordre, il y aye de l'inordination, & qu'il soit ainsi nommé par Antiphrase, comme *bellum*, pour n'auoir point de beauté: les Parques parce qu'elles ne pardonnent point, & les Eumenides nom de douceur, denote les furies?

Messieurs, la plus grande corruption, disent les Naturalistes, naist de la plus parfaite cōposition, & les figues douces du Prophete furent les plus ameres tournees.

Plus yn horloge est delicat , plus facile est-il à dilloquer & quand il est alteré plus difficile à remettre : disons cela de nostre Ordre.

L'Eglise est *ceste belle entournee & attournee de varietez avec son aggrappe d'or*, qui est le respect ame de tous ses rangs.

L'honneur & la reuerence quoy qu'on en die, est l'élément & l'aliment de la charité, & le ciment de la societé humaine.

Où l'esclat de l'escarlata d'Appollo abor-  
doit, l'antiquité croyoit que la reuerence y arriuoit aussi tost: que ne rendons nous  
pareil deuoir à celle qui si dignemét nous  
preside?

Mais malheur, oseray je dire que,

*Non audit currus habenas?*

Et que plusieurs Phaetons conduisent  
le Char du Soleil?

Quelle confusion de rangs, que de con-  
testations és seances & preseances, sans cō-  
siderer qu'aux Processions nous declarōs  
publiquement qu'emmy nous *sunt nouis-  
simi primi*.

Nuls Conciles Prouinciaux, peu de dis-  
cipline Ecclesiastique sinon trauersee de  
mille abusives supercheries, par ceux qui  
par alluion ou droict d'accroissement pra-

tiquent sur nous la seule reigle de Soubstraction: & *absorbent iunctos petra iudices nostros.*

L'Eglise Gallicane n'est plus, ie le dy avec douleur, *vn camp bien rangé*; Vn Ciel mesuré & compasse d'une cadence bien reiglee: *Vn iardin clos, dressé en parterres bienuelez & alignez*; le desordre s'est glissé, & fourragé dans ses entrailles.

Vous direz à l'adventure, Messieurs, que ie m'attache à de maigres sujets pour y former de si grandes plaintes, comme aux Commandes tolerees, à la chasse, aux habits, aux colets, aux respects, que ce sont matieres qui ne regardent pas le fôds & le solide de nostre profession. Et ie vous confesse voirement que ce sont de foibles matieres.

Mais comme l'hyronde & le Dauphin sont plus admirables rasans la terre, celle-la en volant, cestuy-cy nageant en petite eau, que l'une voltigeant en grand air, & l'autre vogant en pleine mer: Ainsi estime-je plus difficile de soustenir vn sujet rauale, que de s'estendre & espandre en des matieres releuees, qui comme les tapisseries de brocatel, se soustiennent de la solidité de leur estoffe.

Et bien que ces desordres paroissent petits si tirent-ils de grandes consequences, & sont de tant plus scandaleux, qu'ils sont mieux recognus par le bas esprit du vulgaire.

Platon tanca vn enfant joüant aux noisettes, non pour la quantité de la chose jouee: mais pour la qualité du jeu qui est tousiours mauuais de foy, & seminaire aux petits de desbauches en leur aage aduancé.

O Dieu, que seroit-ce si d'une dent de Theon, ie voulois planter la morsure dans les corruptions de tous les Ordres de ceste Monarchie, quelle intolerable puanteur sortiroit de ceste apostume, si ie la perçois avec la lancette de ma langue?

Si ie voulois battre la pompe de vostre pompe, quel cœur ne bondiroit à l'insupportable exhalaison de ceste sentine?

Contentez-vous & me sçachez gré de ce que, *Ego vobis parco*, & me remerciez du peu que ie vous dis, considéré le trop que ie vous pourrois dire.

Si i'ay pincé les habits, ie vous ay traité comme les Precepteurs des enfans des Roys de Perse, qui corrigeoient ces jeunes Princes fustigeans deuant eux leurs veste-



mens sans toucher à leur peau qu'ils tenoient pour sacrée.

J'ay fait comme Dauid, qui ayant Saul en son pouuoir dans vne cauerne, se contenta de luy couper vn bout de son manteau.

Voire & comme l'Aigle rauisseur de Ganymedes, j'ay respecté vos vestemēs, sçachant que l'onguent d'Aaron de dessus vos chefs, *a coulé iusques à leurs bords.*

Et comme les Peintres, ie n'ay représenté que la premiere peau & les desordres superficiels sans penetrer aux maux plus internes que ie laisse au iugement de celuy, *à qui toutes choses sont nuës.*

Ie viens de ce pas à vous, ô Noblesse, qui ne deuez attendre de moy aucune blandice, puisque vous venez d'entendre avec quelle liberté ie viēs de traiter ceux de nostre Ordre, emmy lesquels biē qu'indigné d'un si insigne caractere, j'ay l'honneur de tenir quelque rang.

Le premier des trois principaux desordres que ie remarque emmy vous, est ceste grande confusion qui vous pesse-mesle presque sans distinction comme rats en paille.

*Que sont deuenues ces belles & rele-*

uees qualitez de Seigneurs, Barons, Comtes, Marquis, Ducs, qui autresfois estoient les degrez qui differentioient vostre Ordre? quelle horrible decadence défigure tout cela? comme tout y est-il alteré, chargé, & si j'ose presque dire, aneanty? Marquez-moy en quoy consiste maintenant ceste difference? toutes vos espèces sont-elles pas de mesme mesure? l'extremité de nos iours a elle mesme exempté les Princes de se mesurer avec les gentils-hommes en combats singuliers? Helas! quels desordres inouys, quel chaos d'embrouillemens.

Je neveux point m'estendre sur la description de ces qualitez si sureminentes du temps de nos Peres, puisque les seules charges & le gouuernement de la moindre bicocque va tenant en escheec tous les plus tiltrez d'un pays, sous la verge d'un qui n'aura ny ces qualitez ny extraction qui puisse estre comptee.

Maintenant que les charges Militaires, & les Gouuernements se debitent comme marchandise de cours & de mise.

——— *quid imaginibus, quid auitis  
plena triumphis;*

*Atria, quid pleni numero consule fasti*

*Profuerint.* —

Si vous n'avez vne vaillante bource pour conquerir par son merite toutes ces places.

Je vous veux dire vn acte digne de l'histoire que i'ay appris de si bon lieu, que ie le vous fers comme vne constante verité. Vn Seigneur de grande extraction, fidelité, qualité, & plus grand en toute sorte de merite, recompensé pour ses longs seruices d'une place tres-importante de ce Royaume, frontiere de l'Angleterre, sollicité sous main de la part d'un grand, de luy remettre ceste place pour cinquante mil escus, qui estoient des monts d'or en ce temps là, à la charge de faire agreer au Roy ceste conuention, au commencement de ceste proposition, outré de douleur, croyant que sa Majesté fust entree en ombrage de sa loyauté tant ancienne & esprouuée, protesta qu'il l'alloit pour rien remettre entre les mains du Roy: mais en fin asseuré que ce soubçon n'estoit aucunement en l'esprit du Roy, duquel seulement par faueur coniecturable, on se promettoit l'agreemēt: Allez, dit-il à cet entremetteur, dites à vostre maistre

que c'est vn moqueur de m'offrir si peu, il y a douze ans que i'en refuse tous les iours deux ou trois cens mille angelots, vous m'entendez assez Noblesse, sans que ie m'explique d'auantage; He bien, ne loüez-vous pas grandement le courage de ce nouueau Fabricius rejettant desdaigneusement l'or des Samnites?

*Nec mi aurum posco, nec mi pretium de-  
deritis,*

*Non componamus bellum sed belligera-  
mus.*

Et quelle fidelité peut estre és frontieres & és places, puis que la venalité ouure tout, & qu'il est tout clair que l'ennemy donnera tous iours le triple, voire le quadruple par dessus le compatriote?

Or sus, Gentils-hommes, dites-nous que sont deuenues ces illustres qualitez, qui ne se donnoient qu'à des personnes signalees & principales de Capitaine de cinquante ou cent hommes d'ordonnance, quelle fumee est-ce maintenant?

Si vous dites que la paix ternit le lustre des qualitez guerrieres, ie le veux: mais à quel jeu auez vous perdu tous les rangs & preeminences que vous auiez és villes pour n'en auoir plus qu'au vilage emmy  
des



des payfans.

Pourquoy faut-il en corps d'Estats, que vostre Ordre en precede vn autre en gros, qui vous deuance en detail, quand vous estes separez?

Mais dictes, quel degre auez-vous es villes principales? quels offices tenez-vous? où entrez-vous? où seez vous? où marchez-vous?

Et chez le Roy, ne vous voyez vous pas tous les iours supplantez? Les cheres personnes de nos Roys vous vont eschapper des mains, si vous n'y pensez de bonne heure. Comme celle de N. S. des nôtres, si nous n'y aduifons, ô Ecclesiastiques.

Où sont ces *soixante braues d'entre les forts d'Israel, qui enuironnent la couchette de nostre Salomon?*

Sommes-nous reuenus à la chanson de Ciceron: *Cedant arma toga?* quel renuersement! la plume taille-elle le fer? deuiendront donc apprentifs ceux qui souloient battre la mesure, d'où vient que de matreaux on vous veut faire enclumes?

Noblesse, pense à ta naissance, meurs, meurs plustost que de degenerer de tes genereux ayeulx; ils ne t'ont pas enflé le

cœur en t'esleuant à de si hauts faictes d'honneur & de gloire, pour te deprimer dans les abysses de l'abiection : vne fois en vostre vie, souuenez-vous que vous estes hommes, que vous estes les fauoris de la Royauté, le bras droict du Prince, le soustien de l'Estat, la fleur plus fine de la nation, la terreur des estrangers, & l'efroy des ennemis.

*Les forts engendrent les forts, les Aigles ne couuent point des Colombes.* C'est vn mauvais augure en ce temps, que ceste façon de parler, il est sorry de Noblesse, disent-ils, au lieu de dire, issu. C'est vne aussi belle chose d'en estre issu & d'en soustenir la vertu, que d'en sortir en degenerant. Cest ancien auoit raison de dire qu'il ay moit mieux estre le premier que le dernier noble de sa race.

Conseruez jalousement vostre ancienne extraction comme la prunelle de vos yeux : c'est vne grace que tous les Roys ny tous les thresors du monde ne scauroient donner, Dieu mesme tire sa Noblesse de son eternité, & l'appelle *l'Ancien des iours.*

En Calicut les Nobles tiennent vn rang comme sur-humain, c'est vn cri-

me mortel, quand vn roturier frotte seulement le manteau d'un gentil-homme, de sorte que leurs valets qui marchent deuant eux par les rues, crient aux contours qu'on se destoune à peu pres cōme les gondoliers à Venise. Ils reputent les ignobles pour esclauēs, comme les Spartains leurs flottes. Tout maniemēt des armes leur est interdit, sinon en cas de necessité quand les Nobles commandent.

Et en France jamais on n'a recogeu autre Noblesse que celle qui a vn costé de fer. Les Spartains peignoient leurs Dieux tutelaires tousiours armez: tels estes, vous, ô Gentils-hommes, tousiours prests à combattre pour la deffence du Prince & de la patrie.

Vous naissiez l'espee au poing comme des Minerues, & pareils à ceux des races de Pithon & de Cadmus qu'on recognoissoit à vne lance, que les descendants de celuy-là, & à vne hache, que ceux de celuy-cy portoiēt empreinte en la cuisse: aussi se faict signaler nostre Noblesse par son extreme inclination & propension aux armes.

Tous Achilles nourris de mouëlle de



lyon, vostre corps est tout cœur, vostre sang tout courage.

*O belle Noblesse, si tu ignores ta condition, fors & t'en va emmy les pastres, mais si tu te rauigores de quelque ressentiment, releue-toy contre le faix qui t'accable, & dy avec l'Espoux, que tu monteras en la palme pour goustier de ses fruiçts.*

Le second desordre que ie voy parmy vous, est celuy de vos exercices: Non que ie blasme les corporels qui sont necessaires au maniemment des armes, mais de vous y voir si entierement attachés, que vous ne donniez presque aucune culture à vostre esprit, ny de temps pour le meubler de cognoissances iudicieuses & solides, c'est cela que i'improuue.

Iouïr, dancier, voltiger, escrimer, chanter, chasser, se parer, se promener, voyla presque vos plus serieux entretiens: & c'est vne plaisanterie d'entendre qu'au jargon commun, on appelle cela des vertus.

Se friser, se godailler, se tirer, se guinder, se poudrer, honteux artifices de femmes, oseray-je dire que ce sont les excellences de plusieurs? Quelle vanité de surencherir son estime par des frizeries de cheuaux panadans, des habits de nouuel-



le impression, des modes fantasques, des esgrettes empanachees, des plumets voltigeans au gré de l'air, symbole de testes fort graues? Mais quelle ineptie, voire quelle lascheré de cœur, de se bouffir pour des choses si friuoles & folastres? on mesprise plustost qu'on n'admire la beauté qui semire, ce n'est plus beauté d'estre beau quand on s'en regarde, negligee, elle a plus de grace & de prix.

Diray-je que toutes ces delicatesses forment en vous la faineantise, vostre element vostre aliment, qualité inseparable de vostre substance? car ne rien faire en termes communs, c'est viure noblement & viure noblemēt c'est viure mollement. *Car les Courtisans*, dit le texte Euāgelique, *& ceux qui sont es Palais des Roys se vestent mignardement.* Et cependant viuans ainsi avec Venus, d'oū vous vient ce courage carnacier qui par la rage des duels, vous fait mourir avec Mars?

Diray-ie que ceste ferardise engendre le douaire de l'ignorance que vous affectez, en sorte que tel qui a encores quelque sçauoir aymeroit autāt qu'il luy fust tombé vne dent, qu'un mot de Latin de la bouche?

Vostre occupation plus ordinaire, c'est l'esclavage de la cour qui vous entraine avec les fers dorez de ses vaines & fumeuses esperances.

*Vana Palatinos quos educat aula clientes,  
Dicitur auratis neſtere compedibus.*

Promethees rongez d'ambitions, Ixiôs suppliciez d'une rouë continuelle, embrasseurs de nuages.

Et cependant en ceste publique tranquillité qui pend vos espees au croc, vous vous laissez piper de ceste fausse persuasion que vous ne pouvez acquerir le nom de vaillans quen vous esgorgeans les vns les autres.

Ainsi nostre chaleur naturelle n'ayant point de viande pour agir, se rue sur le propre sang & le ronge.

Ainsi comme d'autres Themistocles, vous vous plaignez de la paix, qui est neantmoins le seul fruit de la guerre, & l'unique manne du Ciel.

Le troisieme desordre qui regne parmy vous, est le desordre mesme, par le manquement & renuersement de toute discipline militaire, que rares, que nulles sont les Academies où s'apprenne ce digne, & noble, cest excellent mestier de

la guerre.

Estimez vous comme des Pompees, que ce soit assez de pendre vne espee à son costé pour faire aussi tost la loy à tout le monde? O que de Capitaines qui ne furent jamais soldats, que de braues soldats qui diseteux d'argent, & regorgeans de merites, ne seront iamais Capitaines, puisque la porte de fer & de sang est changee en porte doree.

Or ce mal vient de vous-mesmes, quand vous priserez vostre condition & l'exercerez affectionnement chacun l'estimera, l'estat vaut selon l'homme, & la terre autant qu'on la fait valoir; que si vous la desdaignez chacun la desdaignera.

Remirez quelquesfois ce grand Mont-luc, qui a sceu si bien en imitant Cesar, faire dire à sa plume les coups de son espee, lisez en ses commentaires comme il paruint par tous les degrez de milice, à ces grandes & honorables charges, dans lesquelles ils'est enseuely glorieusement.

Tout Marechal de France qu'il fust, si voulut-il que ses enfans commençassent à porter les armes par les plus basses marches, à present on ya bien d'un



autre air, on veut voler dès la coquille,

Vous vous amusez à certains faux hōneurs pleins d'ostération, de mōstre & de parade, & quittez pour l'ombre le corps. Vous iugez à la mine, à la fraize, aux bottes, quel homme on est, foibles marques, foibles remarques.

*Falsus honor iuuat & mendax infamia terret  
Quem nisi mendosum & mendacem. —*

Cesar voyant à Rome des estrangers fort empressez apres des Cagnolins, demanda si les femmes en leurs pays ne produisoient point d'enfans, comme disant qu'ils eussent mieux fait d'employer leur affection vers leur progeniture qu'apres des animalers. Je vous assure que vous vous attachez à certains petits agence-mens qui vous font eschaper le solide de vostre profession.

Tant de paremens pompeux, tant de despences superflües, que le monde estime magnificence, sont estimees par les sages pour bassesse de cœur.

Vespasien sentant vn Capitaine parfümé, l'odeur de l'ail, luy fit-il, te seroit mieux seante: repensez quelquefois que ce n'est pas par ces mignardises que vos  
Peres



Peres ont esleué cette Monarchie au feste de grandeur où elle est, & vous ont fait heritiers de leur imperissable gloire.

Il tourne maintenāt la pointe de mon discours vers les desordres que mes yeux apperçoient dans le tiers Estat. Le plus signalé & important de tous est, que cet Ordre tel qu'on nous l'a composé en ces Estats, ne me semble rien moins que le tiers Estat. Patience Messieurs, tolerez l'ingenuë franchise de cette proposition, & sursoyez vostre iugement iusques à ce que vous ayez entendu les raisons qui me l'ont fait aduancer.

Vous sçavez qu'il est incivil de iuger de la loy sans l'auoir tonte leuë, les affaires ne se decident pas sur l'etiquette.

Je me suis tousiours figuré par le tiers Estat la basse region de l'air, la lie & la tourbe du peuple distinguee en marchans, artisans, bourgeois, & villageois, & pourquoy maintenant, *vulgum tam chlamydotos quàm coronam vocare?*

N'est-ce pas vn creue-cœur intolerable à tant de grands Prelats, à tant de releuez Gentilshommes, d'auoir sous le

tiltre très honorable d'officiers du Roy plusieurs parens enuoloppez dans la tourbe des roturiers, bien que leur extraction, & leur naissance en tire beaucoup de fort ancienne Noblesse. Qui peut supporter sans impatience cette indignité estre faite à la Iustice mestier ancien & propre des Roys, & aux Finances profession toute doree?

Qu'est-ce que la Noblesse, sinon vn rayon de la Royauté, & qu'est-ce la Iustice, sinon l'auctorité Royale, & presque la Royauté mesme, si en la Monarchie elle n'estoit indiuisible?

Mais, où voulez vous donc que se rangent les Officiers? dās l'Eglise, non, car elle n'admet en ses rangs que ceux qui ont le caractere de l'ordre, qui obseruent la continence, & qui ont renoncé à la chair & au sang, contraire à la mer, qui vomit les corps morts: elle reiette ceux qui sont vi-  
*uans en delices, & dans les negoces seculiers,*  
*elle rebutte les prophanes,*

— *Procul, ô procul este prophani*

*Conclamat vates totoque absistite luco,*

*Castra s'appelloient quasi casta, & ce sont proprement les rangs de son armee,*

qui comme les Spartains en leurs exercices n'admettent point les mariez.

Sera-ce à la Noblesse qu'ils auront recours ? encores moins y trouueront-ils d'entree : car comme la mer pour persister en nostre comparaison, reiette les corps sans ame, celle cy de mesme rebutte les hommes sans armes.

Et pareille à l'huile furnageate, qui ne se mesle avec quelconque liqueur qu'avec sa semblable. Ces Alexandres ne courent en la lice qu'avec les Roys.

Où aller donc ? car s'ils ne sont assez Nobles pour se ranger à la Noblesse : d'ailleurs ils me semblent trop releuez pour se raualer au tiers Estat, sera-ce vne quinte-essence de tiers Estat, de Noblesse, & de Noblesse du tiers Estat ?

Quelle part logerons nous ces Amphibies, sera-ce comme la Loutre, qui est chair emmy les poissons, & poisson parmy la chair ?

*Extremi primorum extremis usque priores.*

Seront ils comme le Cygne viuant dās les eaux, les airs, & sur la terre : mais oyseau de rebut en l'ancienne loy.

Ou comme cet Aigle bizarré dont par-



le Pline, qui a deux pattes differentes , vivant de la proye des airs & des eaux , ou comme la Ratepenade quadrupede parmi les oyseaux , & oyseau entre les quadrupedes, diriez vous pas en cette incertitude , que vous voyez la peinture qui comence l'art d'Horace?

Pareils à l'arbre de Daniel, & à l'eschelle de Iacob , ils touchent le Ciel de leur sommité, & la terre de leur pied , esleuez iusques sur la Noblesse en leurs fonctions , raualez avec la populace en leur seance.

Messieurs, ie vous assure que cela est dur à supporter à ceux qui sçauent combien plus d'honneur est deu à la Iustice, & combien sont plus respectables les Officiers d'un grand Monarque, qui representent sa personne en tant d'Instances, que qui les frappe *tonche la prunelle de ses yeux*:

O Noble d'extraction qui te fourre au tiers Estat cõtre ta naissance, quel descouragement te fait degenerer? ô abiect.

*Nec tibi dina parens generis nec Dardanius author.*

Ne vois tu pas que tu tiens & occupe la place du pauvre, qui cependant languit,



& n'est pas sensiblement entendu en ses iustes plaintes & doleances: Si tu mesprises cette marque pour toy, songe à ta posterité, qui peut estre plus valeureuse verra avec regret son nom enregistré en vn lieu disproportionné à son courage.

*Si te nulla mouet tantarum gloria rerum,  
Ascanium surgentem & spes heredis Iuli*  
*Respice* —

Quelle plus iuste Noblesse dira-on que de seruir son Prince en qualité d'Officier? iel'aduoüe: mais ien'y voy qu'une chose à desirer; qui est de r'entrer dans la valeureuse generosité de vos ancestres pour vous r'ouuir ce pas que vous clost le dessaisissement del'espee.

On ne cognoist point de Noblesse en France que celle du fer & du sang, & cette Noblesse fait sa principale vertu de la valeur de laquelle on la void si esperduement idolatre, que pour vne ombre qui paroist en la forcenerie des duels, on l'y void tous les iours se ruer & se tuer à corps perdus & vie & ame encores.

Desorte, Officiers tres honorables, que ie ne voy que cette perte qui vous puisse introduire en l'ordre plus releué que celui où vous estes ie ne scay cōment releguez:

Et que l'on n'estime point paradoxique cette proposition de ioindre l'espee à la sotane, elle n'est point si extrauagante que l'on croira à l'abord, nous sommes les vniques du monde qui auôs disioinct ces deux pieces.

De vray il a esté iugé pour heresie ce qu'un Ancien Empereur, mal conseillé, voulut entreprendre de faire aller à la guerre les peuplades de Moynes qui formilloient à milliers dans les deserts de l'Orient, & parce que l'Eglise abhorre le sang, mere toute douce, toute sacree, toute sucree, & parce que la deffence du port & vsage des armes est entierement defendu aux Clercs par tous les saints Canons, fondez sur la deffence faite à S. Pierre par N. S. & en sa personne à tous les Ecclesiastiques, de frapper de glaiue materiel, le cas de necessité, & de la defensiue tousiours excepté, suyuant la loy de nature,

Si est-ce que nos histoires celebrent encores le courage & la mort valeureuse du bon Turpin Archeuesque de Tours, & de fraische datte le successeur de S. Hilaire, viêt de rēdre, pour le seruice du Roy, d'assez bones preuues de sa fidele generosité.

Mais quand à ceux qui sont purement laïcs & prophanes, ie ne voy pas qu'aucune autre fonction ny exercice les dispense de ceindre l'espee pour la deffence du Prince & du pays, sinon le seul manquement de cœur & le clair adueu de pure poltronnerie.

Toutes les nations ont ioinct avec les armes la litterature propre à l'administration de la iustice.

Les 70. Sanhedrin assistans de Moyse, en la distribution de l'equité à Israël, seruoient de Capitaines aux rencontres de la guerre & de principaux chefs encores.

Entre les Grecs, qui ne sçait que Demosthene, cest Aduocat fameux, fut au pas des Thermopyles en qualité de Chef, aux enseignes qu'il s'enfuit meilleur en langue qu'en lance?

Ifocrates estoit tres-vaillant & tres-eloquent, & Xenophon nous laisse en suspens à qui nous donnerons la palme ou à sa plume ou à son espee.

Pericles, & Themistocles, & Photion, & cent autres estoient & tres-diserts, & sçauans Iusticiers, & tres-valeureux Capitaines.

Parmy les Latins, qui vid iamais tant de science avec tant de courage, tout

Mars dans le cœur toute Suade sur les levres. Ciceron, ce miracle & prodige d'éloquence, encore estoit-il soldat, quoy que piteux soldat.

Les Senateurs Romains estoient-ils pas faits & Consuls, & Dictateurs, & Maistres de Caualerie? donnoient-ils pas à la guerre & pour cela ne posoient pas leur robe.

*Romanos rerum Dominos gentemque togatam.*

Sylla, Antonius, Hortensius, Lepidus, Cesar, & mille autres quels estoient-ils, & à dire & à faire, & tous portans la robe longue?

Est-ce la sotane qui empesche qu'on ne ceigne le baudrier? allez voir si les Turcs, desquels nous auons pris & appris & le nô & l'habit Soltanesque, ne portent pas leurs cimenterres sur leurs longues sotanes? s'ils ne vont pas à la guerre avec? s'ils ne montent pas à cheual avec? s'ils ne s'arment pas avec? Et vos casaques d'armes, Noblesse, monstrent bien à leur antique vsage, que vous n'avez pas tous-jours esté ainsi vestus de court.

Voyez la Cour Imperiale en Allemagne, vous y trouuerez les Conseillers entrer l'espee au costé, & prou de Latin,

&



& de loix dans la teste.

A Venise les Senateurs laissent-ils de porter l'espee avec leurs robes batantes les talons, & pour estre ainsi vestus, cessent-ils de se dire Gentils-hommes?

Les Parlemēs d'Angleterre & de Pologne sont-ils pas armez? & Iustinia mesme veut-il pas *que la Majesté Imperiale soit armee de loix & decorée des armes*: Les Legistes se disent-ils pas *soldats enrobez*?

Et quoy? en nostre France, quand la Iustice se faisoit sous l'orme, quand les Parlemens estoient ambulatoires, quand la Iustice se rendoit à l'Hôtel du Roy, par qui pensez vous qu'elle fust administrée, sinon par de doctes espees?

Les Baillifs & Seneschaux sont-ils pas tousiours pour marque de ce, chefs de la Iustice, bien que leurs lieutenans qui grossissent le tiers Estat, se soyent subrogez en l'administration?

Quoy? s'il en faut croire les Poëtes, Nemesis cette deesse iusticiere, n'est-elle pas peinte & feinte avec vne bride d'une main, & vn glaive de l'autre?

Et Minerue ne toute armee & toute sage du cerueau de Iuppin, denote-elle pas combien c'est vn riche accouplage

que de la science avec la valeur.

Et la iuste administration *du glaive*, à qui appartient-il mieux qu'à la Iustice, puis que c'est la marque de l'authorité souveraine, que les Princes resignent entre les mains de leurs supremes Magistrats?

Prenez donc ce courage & ces outils, Messieurs, & avec cela releuez vous par dessus ce rang ravalé, indigne de vostre grandeur.

Laissez la place au pauvre, & que ne voyôs nous reuenir le siecle d'or, des souquenies de toile, des iacquettes grises, ces bonnes gens, Auditeurs, n'ont rié de gros que la robe, ce n'est que iugement, que fermeté, que solidité, nulle feintise, nul desguisement, nulle dissimulation, tout respect, toute reuerence, mais toute verité: vous souuient-il point de ce Poëte,

*Est etiam olitor sepe opportuna locutus.*

Tesmoins les Suisses, tesmoins les Suisses, desquels la sage grossiereté met nostre eminente subtilité à la bataille & au tribut, & nous sçait faire contribuer sans faire la guerre, seruiteurs en apparence, maistres en effect.

Mon Dieu, que la rusticité est bien sentee, non alteree en ses productions, non

artificieuse en sa conduite, toute naturelle, toute pure, toute candide.

Au demeurant, nous naissons Orateurs pour discourir de nos miseres, les payfans de nos villages, s'ils estoient nos condeputez, ils nous feroient leçon de constance & de fermeté.

Pensez qu'il faiet bon ouyr discourir des miseres du pauvre peuple avec des robes de soye, & des paroles de mesme. Cela faiet plaisir d'entendre si bien dire au lieu de pitié, & ces plaintes sont trop douces pour partir d'un sentiment amer, & cela conuie à faire durer le mal pour l'ouyr si delicatement souspirer.

Nous ne sommes que pompe, & nous lamentons la calamité, n'est-ce pas Demades Orateur parfumé, qui persuade à Athenes l'austerité des Spartains?

Les Gabaonites n'en firét pas ainsi pour esmouuoir Iosué à commiseratiō de leur foiblesse.

Les Lyciens plaignoient leurs morts en robes de femmes, & sacrifioient à leurs Dieux en robes de deuil, souuenez vous des tristes habits des pleurantes des Anciens; Nous persuaderons mal-aysement la famine populaire, & les oppressiōs des



miserables avec des robes de magnificence, & de haut appareil.

Le second desordre que ie voy au tiers Estat, est que ces belles robes & la viuacité des esprits qui le composent, le portēt à rechercher des curieuses matieres, esquelles ce n'est aux prophanes de s'ingerer, comme cette braue, & non iamais assez loüee Noblesse, l'a prudemment tesmoigné.

Chaque chose a ses bornes, & la mer mesme fremit, recluse dans les siens.

Tres-bon pour les esprits fretillans & pointillans ce precepte, *Qua supra nos nil ad nos.* Les Emblemes de Promethee, Icare, Phaëtō, Ixion, Thales, Epimethe, sont riches pour exprimer le mal qui reuient de trapper la portee.

Tres-bien le Sage diuin, *Noli altum sapere, sed time.* Si la loy des Argiens contre les introduceurs de loix nouuelles, auoit lieu icy de les proposer la hart au col,

— Parati

*Aut suadere legem, vel certa occumbere morti.*

Maints ont remuante voix en Chapitre qui ne respireroient plus.



Ou pratiquée celle des Rheteurs de Lyon qui deuoient vaincre ou mourir: de là le vers du Satyrique.

*Vt Lugdunensem Rhetor dicturus ad  
aram.*

A l'adventure seroit on plus retenu de ietter en fonte toutes sortes de propositions.

La belle chose que de faire son fait sans escornifler la profession d'autrui; la grenouille qui se voulut enfler en bœuf creua par la pance.

La presumption & le cuider sçauoir, n'esleue les esprits, que commel'Aigle la tortuë pour les faire tomber lourdement.

Vous serez comme Dieux, disoit ce vieux serpent à nostre premiere mere, vous sçauriez le bien & le mal: or qui peut auoir ceste science sinon Dieu, *delicta quis intelligit?* cognoissance que priuatiuement à tout autre, il a laissé à son Eglise qui a de luy la science de la voix.

Ne vous y frottez pas, la Theologie n'est pas vn baston qui se laisse manier aux apprentifs, moins aux Autodidactes.

Gardez d'encourir le sort de ce Satyre de la fable, qui voulant embrasser le feu qu'il estimoit aussi doux à toucher qu'à

voir, y perdit & le poil & la peau.

Les Seraphins mesmes ne prennent ces charbons ardans des diuins escrits des paroles sacrees, qu'auec des pincettes.

Ces espineuses difficultez n- se manient pas sans gantelets, quels Salmonées

*Qui flammās Iouis & tonitrus imitantur Olympi.*

Redoutez vous point leur punition vous qui vous rendez complices de leur temerité?

*La beste*, dit Dieu à Moysel'appellant sur Sina, *qui touchera la montagne mourra de mort; dy au peuple qu'il s'en tienne esloigné s'il ne veut encourir pareille peine.* Qui est le vulgaire, quelle prophane; sinon *Homo animalis*, comme dit S. Paul, *& qui non percipit ea que sunt Dei?* La mort spirituelle des Anathemes est annexee à leur outrecuidance, routes les fois qu'ils s'ingerent de toucher, traicter, ou approcher du sanctuaire appellé, *mons domini in vertice montium*. Dieu ne communique ses diuins mysteres & secrets de religion, qu'à ceux qui ont leur mission, & vocation pareille à Moysse.

Sçauiez vous pas que les perdrix se prennent à la lueur d'un miroir, & que le fol

Papillon se brusle au lustre ardant du flambeau dont il trouue le flamber si beau? Vous qui flairez de loing les delicieuses roses de la Theologie, aduisez de ne vous poindre aux picquans qui les entourent Comme *il est inciuil à celuy qui est consacré à Dieu de s'immiscer és negoces seculiers*, il est pareillement impertinent au prophane de se meller és choses directement ou indirectement sacrees, & qui regardent la Religion de quelconque biais.

Periander estoit vn habile Medecin d'Athenes qui quitta ceste profession pour s'amuser à la poësie où il rencontroit piteusement. Je m'estonne de toy, luy fit vn de ses amis, ô Periander, qui ay mes mieux estre mauuais Poëte que bon Medecin, & ie m'esbahis de mesme de quelques sçauanteaux du siecle qui abandonnent la iuste gloire de paroistre sçauans en leur art, pour se faire siffler & huier comme des Asnes en Theologie.

Megabyfus grand courtisan de Grece, s'exposa & immola à la risée des valets qui broyoient l'ocre en la boutique d'Appelles, se voulant ingerer de discourir de la peinture où il n'entendoit rien,



voire & de s'indiquer les ouurages de ce  
 sçauant peintre; & qui ne bafsoüera l'im-  
 prudence (vn moins moderé droit im-  
 prudence) de quelques minces & foibles  
 esprits qui ont voulu regratter & control-  
 ler les discours publics de ce prodigieux  
 esprit, rare ornement du sacré pource, du-  
 quel les actions sont des perfections, &  
 les perfections des miracles, la merueille  
 & la cresse des doctes de nostre siecle:  
 foible lutte de tant de Cigales contre vn  
 Cocq., de tant de Pigmées contre cest  
 Hercule Alexicaque.

Malheur à ces prophanes outreuidez  
 bastisseurs de Babel, *precipita domine, diui-  
 de linguas eorum, quoniam vidi contradictio-  
 nem in ciuitate.*

Il y auroit icy lieu Messieurs, de pro-  
 duire en troisieme instance les desor-  
 dres de la Iustice & des finances; ie sens  
 vos oreilles qui s'ouurent, vostre atten-  
 tion qui se renouuelle, piquée de cest at-  
 tente & resueillee par vostre desir.

Mais, Messieurs, ie vous frustreray  
 pour ce coup de ce plat, il est trop ample  
 pour vne desserte, il n'est ny de mon pro-  
 lect, ny de mon dessein (& i'en fay icy  
 vne protestante declaration) de parler de  
 la



la Iustice ny des finances, pour tout plein de raisons.

Premierement il y a de la Iustice en France, ou non: s'il y en a, comme ie me le veux persuader, pourquoy voulez vous que j'inuectiue contre vne vertu si sainte, si Royale, si vniuerselle, puisque selon le bon Hesiodé chez Aristote, *elle comprend en soy toutes perfections*, & sans laquelle vn ancien dit, *que les Royaumes ne seroient que brigandages*?

S'il n'y en a point, & pourquoy voulez vous que ie m'escriue contre le non estre, le Philosophe m'apprenant que, *non entis nullæ sunt qualitates*? Voulez vous que ie combatte, *quasi ærē verberans*?

Moins contre les finances, esquelles ie ne voy goutte parmy tant de milliers de Soleils. Ce Rheteur haranguant de la guerre fut mocqué par Pompee, aussi sçauant en cet exercice de main, que l'autre estoit ineptement docteur en celuy de la langue: ie me victimerois au rebût des entendus, si ie voulois controuller ce à quoy ie n'entends rien.

Et Dieu mercy: car puis que l'Euangile le difficilise tant l'entree du Ciel, estroicte

côme le pertuis d'une esguille, à ceux qui  
côme chameaux se feront chargez de tant  
de bagages de richesses, ie veux biẽ quit-  
ter tout cela, puis que ma condition me  
recommandant de *thesauriser au Ciel*, me  
defend d'adorer comme beaucoup font,  
le Soleil des abyssmes.

La seconde raison qui me retient de  
m'espandre sur les desordres des ordres,  
practiques, que ie ne die trafiques, de iu-  
dicature, est le trop que i'aurois à dire, &  
le trop peu de temps qui me reste à vous  
entretenir. Vous sçavez *que les mediocres*  
*douleurs se plaignent: mais les excessives as-*  
*soupissent les sens.* Le bocal ne peut vider  
l'eau quand il est trop plein, *disette de l'a-*  
*bondance.*

Et puis de cecy, comme disoit cet An-  
cien de la Romaine grandeur, *Il est plus*  
*iudicieux de n'en dire rien que peu.*

Cet Ancien accusé de mauuaise halei-  
ne, ie pense bien, fit-il, il m'est pourry biẽ  
des mots en la bouche: ie ne sçay pas ce  
qui m'arriuera, mais si aurois-je assez de  
pouuoir sur moy, pour estouffer les maux  
& pourritures de ces Estats en la mienne,  
laquelle cependant, *premit altum corde dolo-*  
*rem.*

La troisiésme raison de ce silence est, que puis que les Medecins Spirituels en desesperent la guerison, si i'auois à les cōseiller, ie les enuoyerois volontiers simplement à confesse.

La quatriésme, est le respect & la crainte: celuy là, car il est dict, *Dij's non detrahes*, & saint Paul se reprit d'auoir appelé vn mauuais Iuge, *paroy reblanchie*.

Celle cy, car à cette horrible & espouuātable puissance, au faiste de laquelle ils se sont guindez aujourd'huy, *il n'est aucunement assure d'escrire contre ceux qui peuuent proscrire*.

Quoy? disoit Hortensius l'Orateur, voulez vous pas que ie cedela palme de l'eloquence à Cesar, à Cesar dis-je, qui commande à *quinze legions*?

Denys le tyran estoit tousiours le meilleur Poëte de Syracuse, parce qu'il estoit le plus fort.

Ce n'est neantmoins point tant cette apprehension (lascheté trop molle pour heberger en vn cœur bien fait & courageusement paistry) qui me faict enterrer tant d'odieuses veritez: Je ne suis point si degeneré, que ie preferasse mon sang à la sainte liberté de la diuine parole.



Mais bien, cinquiesmeraison, le mespris & le desdain de ce mestier, duquel i'ay vne extreme auersion, comme Hannibal des Romains, depuis ma naissance. L'aigle ne deploye point ses gryphes pour des oyssillons, ny le Lyon pour vne ignobleproye, content d'estourdir des foibles animallets par le fleau de sa queue.

Et afin qu'on ne croye pas que cela sente la vanité, ie declare que i'apprends cerebut de sainct Paul Apostre par dela toute exception, lequel parle ainsi aux Corinthiens, *Nescitis quia Angelos indicabimus, quanto magis secularia? Secularia igitur iudicia si habueritis cōtemptibiles qui sunt in Ecclesia, illos constituite ad indicandum, ad verecundiam vestram dico.* Je laisse ce passage en sa pure & simple naifueté sans le faire parler nostre langue, & sans l'estirer en paraphrases, il est assez capable de faire monter l'auertin en beaucoup de cerueaux.

Et Dieu veuille que ce silence & ce proteste de ne rien dire, ne soit encores interpreté de mauuais ply: car ie recognois qu'il y a des gens, *Quorum superbia ascendit semper*; lesquels pareils à ce roc d'Elide, excitent des tonnerres quand on les



touché du bout du doigt, tange montes & fumigabunt.

Et à celac d'Irlande, dont les bouillons sautent aux yeux de ceux qui le regardent.

Il est difficile de frapper vn balon sans le faire bondir.

Moins parleray-je contre les desordres des marchans & artisans : car bien que leurs abus, artifices & sophistiqueries soiēt grâdes, si est-ce que telles quē soyēt leurs marchandises, si les tiēs-je encores meilleures que les dērees de ceux que ie viens d'espargner, de maniere que ie ne pourrois sans quelque espeece d'iniustice, *absoudre les corbeaux censurant les colombes.*

Pauvre peuple, hélas ! ie ne plains que toy & ta misere, comme vn spectre & fantosme, rode tousiours deuant mes yeux, me suit & poursuit en toute place.

— *te nostra sepe myrita,*

*Te nemus omne canit.* —

Toutes les fois que i'ay eul l'honneur de parler en public, i'ay prié & crié pour ton soulagement & pour ta deliurance du purgatoire de tes oppressions, ie reclame encores pour toy avec Iob. *Miseremini meo, miseremini mei, saltem vos amici mei.*

Touſiours tu roules en ma memoire,  
*Hylam nemus omne ſonabat.* Tu ne ſçaurois  
 perir en ma ſouuenance; ma compaſſion  
 eſt auſſi grande que ta paſſion, tes ſouf-  
 frances me ſont des outrances.

*Si oblitus fuero tui obliuioni detur dextera  
 mea: Adhareat lingua mea faucibus meis ſi non  
 meminero tui.* O monde, monde, Dieu te  
 rendra le change de tant de maux que tu  
 fais ſouffrir au pauvre, il te fera rendre  
 compte exact du ſang que tu luy ſuces:  
*Memor eſto domine filiorum Edom,* de ces  
 mâgemens de peuple, *qui dicunt, exinanite,  
 exinanite uſque ad fundamentum: filia Baby-  
 lonis miſera, beatus qui retribuet tibi retribu-  
 tionem quam retribuisti illis.*

Pauvre peuple ſeras tu touſiours l'Asne  
 ſurchargé de la fable, & portant le far-  
 deau du cheual fringant, tu vas creuer  
 ſoubs le faix, & vous richards que deuien-  
 drez vous quand vos metairies ſeront  
 deſertes, vos champs deſpeuplez, l'agricul-  
 ture abandonnee, le laboureur ne pou-  
 uant plus ſubſiſter ny fournir à l'entretien  
 de vos exceſſiues ſumptuoſitez?

Helas, Meſſieurs, le pauvre reſſemble  
 au Crocodil, il a bien des yeux pour plo-  
 rer, mais il n'a point icy de langue pour ſe

plaindre. Misérable la douleur qui n'a point de voix en ses estancemens, *Factus est tamquam vas perditum, amicus supplantavit eum & fraudulentè inuasit eum.* Il est au comble de tous maux & cependant, *Non est qui supponat manum suam, non est qui consoletur eum.*

Vous le sentirez à vostre dam, & peut estre quand il ne sera plus temps, il est vostre baze & fondement, si vous ne le reparez promptement vous verrez crouler bien tost le bastiment de ceste Monarchie.

Monarchie que nous sommes obligez de conseruer, de reparer, de guerir, puis-que nous sommes assemblez pour cest effect en ces Estats generaux, par la volonté & le commandement de nostre grand Monarque.

Volonté sainte, iuste, & digne d'un Roy paternellement amateur de son peuple: volonté inspiree de Dieu *qui luy donnera le parfaire comme il luy a baillé le desir.*

Je ne doute point, Messieurs, que ceste toile de Penelope, ceste fatale fusée, ces feüilles Sybillines, ce part de la montagne d'attente qui nous environne, je veux dire, ce cahier, ou plustost ce volume de Remonstrance que nous faisons & concertons depuis tant de temps,



ne soit prest de se monſtrer au iour de la preſence Royale, & de rouler deuant les yeux de ſa Majeſté.

Les ſentimens de tous nos cœurs vrayement François, ſeront en ces pages, & ces pages entre les mains du Roy, comme *le cœur du Roy eſt entre les mains de Dieu.*

Nous n'auons autre pouuoir que de requierir, ſupplier, & importuner ces Majeſtez diuine & humaine, celle cy l'image de celle là en terre, celle là le Roy des Roys en la terre & au Ciel.

*Demandons doncques & nous aurons, pourueu que nous demandions comme il faut demander, humblement, ardemment, purement, pieuſement, inſtamment, iuſtement, gracieuſement.* Les Roys en cela pareils à Dieu, ſe plaiſent d'eſtre importunez & doucement & volontairement violentés par de chaudes prieres.

*Fleſtitur iratus voce rogante Deus.*

Ne ſçauiez vous pas que le ſeul Amour deſarmoioit Iupin, & ſe iouoit de ſon foudre?

Comme donc Dieu premiere cauſe agit par les ſecondes, & és celeſtes ordres de la diuine Hierarchie, les ſuperieurs influent par les inferieurs, prions ſa diuine  
Majeſté



Maieſté avec tout le zele de nos ames, que comme elle tient en ſa main le cœur pur & l'ame innocente de noſtre Roy, Prince qui nous eſt plus cher que la prunelle de nos yeux, & noſtre Roy tient les noſtres, il veuille par ce cœur Royal influer dans les cœurs de ſes fidelles ſubieſts, mille loyales & ſainctes flammes qui purgent uiſſamment tous les deſordres de ceſt Eſtat.

*Si le Seigneur ne baſtit la maiſon, en vain travaillent ceux qui l'ediſient, en vain veille on ſur la Cité que le Seigneur ne garde, celui qui plante, celui qui arroſe ne ſont rien, c'eſt Dieu ſeul qui donne l'acroiſſement, qui fait naiſtre & la fleur & le fruit.*

Vains les travaux du laboureur s'ils ne ſont humectez de la pluye & eſchauffez du Soleil, inutiles nos peines pendant ces Eſtats, Meſſieurs, ſi nos requestes ne ſont arroſees des Oracles fauorables de noſtre Roy, & infructueuſes ſes reſponſes, ſi elles ne ſont ſuggerees, & ſouſtenuës de la diuine grace.

Les plantes en la creation du monde, comme nous apprend l'hiſtoire de la Genèſe, ne germarent qu'apres auoir eſté viſitez de la pluye des Cieux: toutes nos propoſitions ne produiront aucuns effets,

desquels nous puissions remporter de la satisfaction dans les Prouinces qui nous ont deleguez , si le Ciel n'inspire nostre Roy de les fauoriser d'un rayon de ses graces.

La terre de Chanaan estoit en ce dissemblable à l'Egypte , arrosée de l'inondation annuelle du Nil, qu'elle *attendoit la pluye du Ciel* , & ne produisoit rien sans ceste graisse celeste , Dieu voulant obliger son peuple en ceste demeure de recognoistre tous ses biens de sa main liberalle.

Nos Estats , Messieurs , ne sont pas semblables à ceux de Pologne , d'Allemagne , ou d'Angleterre , ils n'ont pas un ascendant si tres-haut , c'est à nous seulement de demâder , au Roy nostre Souuerain Seigneur de commander , à nous de supplier , à luy d'octroyer ce que bon luy semble , & reietter ce qui ne luy plaist , à nous de requérir , à luy d'entheriner ou de refuser. Il est trop bon pere pour rebutter les iustes demandes de ses pauvres enfans , mais il est tres-puissant pour ne partager sa grandeur avec la bassesse de ses subiets.

Nous pouuons bien comme la Chanaanee le prier si affectueusement pour la France, vexée & languissante, qu'il aura en

elle pitié de soy-mesme, puisque sa Couronne & sa personne est vne mesme chose.

Nous pouuons comme la veufue Evangelique, tant reclaimer apres sa clemence & sa Iustice qu'il nous responde fauorablement, ne fut ce que pour se des-faire de nos importunes clameurs.

Nous pouuons comme d'autres Iacobs, voire au peril d'estre estropiez comme ce Patriarche, luitter avec *cest Ange du Seigneur des armées, Ange de grand conseil, & ne le lascher ny laisser point qu'il ne nous aye bien heurez de sa benediction.* Le presser de nous donner des eaux de benediction, pour rendre la France vn Paradis terrestre, & y ramener le siecle doré par vne sainte reformation.

Outre cela nous ne pouuons rien.

— *Hos fines transilisse nefas.*

Nous n'auons aucun pouuoir ny commission d'ordonner, ny de conseiller, & en tout cas *la seule gloire de l'obeissance nous reste,* comme parle vn Ancien.

Si nous obmettons à requerir, si nous dissimulós les necessitez de l'Estat, si nous cachons les desordres des Ordres, si nous laissons en arriere ce qui peut redonner la

vie, & le lustre à ce siecle l'âguissant & terny, si nous flatons ses vices, si nous ne proposons des remedes à ses deffectuositez, nous sommes voirement des preuàricateurs, nous trahissons la patrie, trompons ceux qui nous ont enuoyez.

*Nos numerus sumus & fruges cōsumere nati.*

Mais si nous ne celons rien de tout cela, si nous mettons tout en euidence *si arguimus, obsecramus, increpamus in omni doctrina & patientia*, i'adiouste & reuerence : si nous poursuiuons de tous nos vœux des iustes demandes, si nous sollicitons ardemment le bien public, n'ayât que ceste nuee deuant les yeux avec le seruice du Roy; que peut & doit on attendre & desirer de nous dauantage? on nous a enuoyez pour demãder avec tres-humbles supplicatiōs, iointes aux genuflexions, & aux l'armes, non pour exiger par force & extorquer rien par violence, ce seroit vn crime de le penser.

Si nous n'obtenons rien *nous lauerons nos mains & les leuerons au Ciel*, avec protestation de nostre descharge, nous secoüerōs la poudre de nos pieds & passerons aux Isles de Cethin.

Nous declarerons que nous aurons fait



ce que nous aurons peu, & partant ce que nous aurons deu *pour panser Babylon, sans la pouuoir guerir, son incurable playe ne se pouuant fomentier par la foiblesse de nos remedes.* Publians à la face du ciel & de la terre, que

— *Si Pergama dextra*

*Defendi possent, saltem hac defensa fuissent.*

N'ayât tenu à nous d'apporter des estayes pour empescher de crouler ce grâd Estat qui faiët pance, & prend coup de toutes parts.

Si nous faut-il tousiours bien esperer, l'esperoir est au fonds de la boëtte de nos miseres, apres le deluge, le rameau d'olieu nous sera peut estre apporté, *tout se faiët en agissant & esperant.* Es mains de Dieu & du Roy *est le sort* de l'euenement de cette notable assemblee.

Le Roy assisté de Dieu, *Atteindra puissamment depuis l'un iusques à l'autre bont;* plein de bonté & de continuelles protestations de nous donner tous les contentemens & satisfactions que l'on peut esperer d'un Roy iuste, clement & debonnaire, & qui ne respire que le bien, repos, & soulagement de ses sujets.

Haltons nous donc de courir à ses ge-

86 *Homelie des desfordres, &c.*

noux, siege de la pitié & de la pieté, pour receuoir d'un cœur respectueux les oracles de ses responces.

Consultons-le, comme vn trepied Delphique, & comme vn autre Salomon, la sagesse duquel estoit recherchee & admiree des quatre confins du monde.

Prions tous Dieu de bon cœur, *qu'il donne à nostre Prince pacifique la sagesse assistante de son siege, qu'il la luy enuoye du haut des Cieux, & du throsne de sa grandeur pour estre & travailler avec luy, & luy faire œurer choses dignes de sa gloire, le conduire sobrement en toutes ses actions, le conseruer en sa puissance, luy faire gouuerner son peuple avec iustice, & le rendre digne heritier de la couronne de son Pere.*

Le sceelle, boucle, & ferre ce pas avec ces paroles diuines & dorees : & cependant, mes tres-illustres, excellens, & honorables Seigneurs, allez en paix.

F I N.

---

*Extrait du Priuilege du Roy.*

**P**AR grace & priuilege du Roy, il est permis à CLAUDE CHAPPELET, Libraire Iuré en l'Vniuersité de Paris, d'imprimer ou faire imprimer, & mettre en vente vne *Homelie des desordres des trois ordres de ceste Monarchie*, PAR IEAN PIERRE CAMVS, *Euesque de Belley*. Faisant deffenses tres-expresses à tous Libraires & Imprimeurs, ou autres de quelque qualité & condition qu'ils soient, d'imprimer ou faire imprimer ledict liure, le vendre, faire vendre, debiter, ny distribuer par nostre Royaume, durant le temps de dix ans, finis & accomplis, sur peine aux contreuenans de confiscation des exemplaires, & d'amende arbitraire, & de tous despens, dommages, & interests, comme il est plus amplement contenu és lettres de priuileges donnees à Paris, le vingt & vniesme iour de Feurier 1615.

*Par le Conseil.*

LE LIEVRE.

THE NEW YORK PUBLIC LIBRARY

ASTOR LENOX TILDEN FOUNDATION  
155 E. 42ND STREET  
NEW YORK 17, N. Y.  
1911

THE NEW YORK PUBLIC LIBRARY

ASTOR LENOX TILDEN FOUNDATION